

# PLEIV SUMVITG

Reglament pil cussegl pastoral  
dalla pleiv Sumvitg

La formulaziun masculina dallas persunas e dils organs en quest reglament valan egualmein era per las persunas femininas.

### **Art. 1 Intent e finamiras**

<sup>1</sup> Il cussegl pastoral ei in organ ecclesiastic nua che parochianas e parochians s'engaschan per ina stretga collaboraziun denter pastoraziun e populaziun.

<sup>2</sup> Il cussegl pastoral collaborescha cul plevon e cussegia quel en fatgs dalla pastoraziun ed organisaziun pastorala.

### **Art. 2 Organisaziun**

<sup>1</sup> Il cussegl pastoral consista ord siat commembers:

- a) il menader,
- b) igl actuar,
- c) ulteriurs quater commembers,
- d) il plevon che fa part ex officio.

<sup>2</sup> Tenor basegns sa il cussegl pastoral era surdar a gruppas ed uniuns gidontras pensums particulars.

### **Art. 3 Commembers**

<sup>1</sup> Sche pusseivel dueien mintgamai dus representants dallas anteriuras pleivs far part dil cussegl pastoral.

<sup>2</sup> Scadina persuna dalla pleiv cul dretg da votar sa vegnir elegida el cussegl pastoral.

<sup>3</sup> Era persunas che appartegnan buca alla pleiv san vegnir elegidas el cussegl pastoral.

<sup>4</sup> Ils commembers dil cussegl pastoral vegnan elegi entras la radunonza dalla pleiv.

### **Art. 4 Temps d'uffeci**

<sup>1</sup> La perioda d'uffeci cuoza mintgamai treis onns.

<sup>2</sup> Il temps d'uffeci ei buca limitaus.

## **Art. 5 Constituziun**

<sup>1</sup> Il cussegl pastoral seconstituescha sez.

<sup>2</sup> Ord il miez vegn elegiu il menader dil cussegl ed igl actuar.

<sup>3</sup> La seduta da constituziun ha mintgamai liug suenter las elecziuns entras la radunonza dalla pleiv.

## **Art. 6 Pensums e cumpetenzas fundamentalas**

<sup>1</sup> Ils pensums e las cumpetenzas fundamentalas dil cussegl pastoral ein:

- a) preparaziun dil program digl onn,
- b) nominar ils responsabels per las differentas incaricas,
- c) approbaziun dil rapport annual dil menader dil cussegl per mauns dalla radunonza da pleiv,
- d) preparar il preventiv per cuvierer ils cuosts dallas occurrenzas annualas per mauns dalla suprastonza dalla pleiv,
- e) approbar il rendaquen annual dil cussegl pastoral per mauns dalla suprastonza dalla pleiv.

<sup>2</sup> Il cussegl pastoral sa drizzar propostas ni recumandaziuns alla suprastonza dalla pleiv, al decanat ni al cussegl pastoral cantunal.

## **Art. 7 Pensums particulars**

Il cussegl pastoral ha ils suandonts pensums particulars:

- a) organisaziun da survetschs divins comunabels (tenor organigram),
- b) organisaziun d'occurrenzas specialas dil liug (tenor organigram),
- c) organisaziun d'events comunabels (tenor organigram),
- d) preparaziun da muossavias e reglaments.

## **Art. 8 Sedutas**

<sup>1</sup> Il cussegl pastoral seraduna tenor basegns, denton silmeins duas gadas ad onn.

<sup>2</sup> Las sedutas vegnan convocadas entras il menader dil cussegl. Treis commembers san pretender ina seduta. L'invitaziun succeda a scret cun comunicar las tractandas silmeins 10 dis avon la seduta.

<sup>3</sup> Da mintga seduta vegn menau in protocol.

### **Art. 9 Cumpetenzza da decider**

Il cussegl pastoral sa decider sche silmeins 4 commembers ein presents.

### **Art. 10 Elecziuns e votaziuns**

Las elecziuns e votaziuns succedan tenor igl artechel corrispudent dalla constituziun dalla pleiv Sumvitg.

### **Art. 11 Finanzas**

<sup>1</sup> Per cuvierer ils basegns finansials dil cussegl pastoral conceda la pleiv in preventiv annual il qual vegn fixaus entras la suprastonza da pleiv sin proposta dil cussegl pastoral.

<sup>2</sup> Per accziuns spontanias ch'ei buca cuntenidas el preventiv annual sa la suprastonza da pleiv sin damonda dil cussegl pastoral conceder in credit supplementar.

### **Art. 12 Midadas dil reglament**

<sup>1</sup> Quest reglament sa vegnir midaus sch'il pli dil cussegl pastoral pretenda ina midada ni sin proposta dalla suprastonza dalla pleiv.

<sup>2</sup> L'approbaziun da talas midadas succeda entras la suprastonza dalla pleiv.

### **Art. 13 Entrada en vigur**

<sup>1</sup> Quest reglament va en vigur cun igl 1. da schaner 2017.

<sup>2</sup> Cull'entrada en vigur da quest reglament ein tuttas disposiziuns che stattan en cuntradicziun cun quel abolidas.

Approbaus dalla suprastonza dalla pleiv transitoria ils 3 da november 2016.

### **Per la pleiv transitoria Sumvitg**

Il president



Igl actuar

